

Communicaziun a las medias – SRG SSR Svizra Rumantscha (SRG.R)

Ultima seduta 2020 dal Cussegl dal public (Cdp) da la SRG SSR Svizra Rumantscha (SRG.R)

*SRG.R: Cuir, ils 18-11-2020*

### **Chattar partenaris d'intervista è adina ina sfida**

Sch'i va per tematicas pli delicatas che vegnan discutadas cun bleras emoziuns, èsi betg adina simpel da chattar persunas che vulan s'exprimer davant la camera u il microfon. Uschia er tar il tema luf e lescha da chatscha. A chaschun da sia ultima seduta da l'onn ha il Cussegl dal public da la SRG.R (Cdp) constatà cun plaschair che RTR è stà premurà da rapportar a moda equilibrada davart questas tematicas.

Ils 27 da settember 2020 ha la populaziun votà davart la midada da la lescha da chatscha. En quest connex gievi tranter auter er per la dumonda: schlucclar la protecziun dal luf, u betg. La gronda sfida per pudair rapportar davart quest tema saja stà da chattar persunas che s'expriman per u cunter questa lescha, ha ditg Flavio Bundi, schefredactor RTR. Tut en tut è il Cdp cuntent cun ils rapports. Ins sentia che RTR haja dà fadia da preschentar ils aspects pro e contra. Ultra da quai saja RTR sa tegnì enavos cun publitgar fotografias e maletgs che avessan pudì svegliar sur mesira las emoziuns da l'aspectatur. Ils rapports sajan stads in bun sustegn per pudair sa far in'opiniun en chaussa.

Ultra da quai ha il Cdp er discutà davart l'emissiun Vita e Cretta ed il podcast Café federal. Omadus formats survegnan bunas notas, ed il Cdp animescha RTR da cuntinuar cun questas furmas d'emissiun.

**Tschintg commembers bandunan il Cussegl dal public**

La lavur en il Cussegl dal public saja adina stada fitg interessanta, è stà il tenor da tut las persunas che han fatg part l'ultima giada ad ina seduta da quest gremi. Il Cdp represchenta l'auditori da RTR, è en stretg contact cun la populaziun e dat mintga trais mais in resun en connex cun l'offerta da radio, televisiun ed online da RTR. Quests resuns succedan mintgamai en furma da rapport e servan ad RTR da reponderar e megliarar sia lavur. Per Lucrezia Berther, Claudia Nicolay, Gianna Sonder, Gion Capeder e Curdin Tuor èsi stà l'ultima seduta. Plirs dad els han fatg part 12 onns al Cdp e ston bandunar il gremi causa limitaziun dal temp d'uffizi. Er il president, Roger Tuor, banduna suenter 12 onns il Cdp. El prenda dentant plaz en la suprastanza da la SRG.R. Sia successura daventa Carmen Dedual, ch'è stada ils ultims onns vicepresidente dal Cdp. Sco presidenta dal Cdp da la SRG.R fa ella er part a las sedutas dal Cussegl dal public da la SRG Svizra Tudestga (SRG.D).

## In sguard enavant

En la seduta dal favrer 2021 vegnan beneventads ed introducids ils novs commembers dal Cussegl dal public. Quai è: Curdin Albin, Alice Bertogg, Patric Collet, Simona Demarmels, Alina Hendry e Marta Lemm. Tranter auter elegia il Cdp lura era ina vicepresidente u in vicepresidente per quest gremi.

### Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 058 136 31 30, telefonin 078 722 53 73